



31. Marts 2011

Inatsisartut suleriaasianni § 37 naapertorlugu Naalackersuisunut apequt imaattoq matumuuna saqqummiuppara:

Naalackersuisunut Apequt:

Illoqarfigisaq qimannagu perorsaasutut ilinniagaqarnermi Namminersorlutik Oqartussat akissarsiat affai akilertalerniarpaat?

(Inatsisartuni ilaasorta, Kristian Jeremiassen Siumut)

Tungavilersuut

Qujanartumik illoqarfigisaq qimannagu ilinniartitsisunngorniarneq ingerlanneqaraangat akissarsiat affaat Namminersorlutik Oqartussanit akilerneqartarput, taamaattorli perorsaasutut ilinniagaqarnermi kommune tamakkiisumik akissarsianut akiliisarpoq, tamannalu allanngortinneqartariaqartoq isumaqarpunga.

Isumaqarpunga illoqarfigisaq qimannagu ilinniartitsisunngorniartarnermi akissarsiat affaat akilerneqartarneritut aamma perorsaasutut ilinniagaqarnermi Namminersorlutik Oqartussat akissarsiat affaat akilertalertariaqaraat.

Perorsaasutut ilinniarsimasut nunatsinni amerlasuut amigaatigivagut ajornartorsiullu tamanna annikillisarneqassappat aqqutissat ilagivaat maannakkut misilittagaqarfigineqartoq illoqarfigisaq qimannagu perorsaasunngorniartarneq nukittorsassallugu kommunellu akissarsianut tamakkiisumik nammattuujunnaartariaqartut.

Naggataatigullu tulluassagalarpoq Kommunit aammalu Namminersorlutik Oqartussat akissarsaatigillutik nammaqatigiittumik taamatut aqqissuteqarsinnaappata najugaq qimannagu ilinniartitsisunngorniartarnerup aqqiissuteqarfigineqarsimanerata assinganik.

Sulisussat siviisumik sullissereersimasut misilittagallilu pigereerpagut, alloriarteqqikkutsigit inui-aqatigiinnut tamanut iluaqutaanissaa qularinnginnakku neriuppunga apeqquteqaatinga Naalackersuisut ilassilluarumaaraat.

Kissaatigaara apeqquteqaatikka ullut suliffiusut qulit iluanni akineqareersimanissaat.